

# Jangan asingkan petani — Anwar

SERDANG, Khamis — Persoalan masyarakat petani, yang menjadi sebahagian besar dari rakyat di negara ini, hendaklah diberi pemerhatian yang menyeluruh, bukan diasingkan dari soal pembaharuan dan pembangunan negara umumnya, kata Timbalan Menteri di Jabatan Perdana Menteri, Encik Anwar Ibrahim.

Ketika berucap merasmikan seminar kebangsaan mengenai Pera-

nan Sains Sosial Dalam Pembangunan Negara di Universiti Pertanian Malaysia (UPM) di sini hari ini, beliau berkata, pembaharuan yang tidak selaras atau tidak seimbang tidak meyakinkan masyarakat.

Katanya, jika pembaharuan hanya berat sebelah, soal sikap dan nilai akan terus digunakan sebagai alasan kenapa kaum petani mundur.

Para sarjana, ujarnya, harus memberi perhatian berat bagaimana mengemukakan kajian mereka secara jujur dan saksama supaya para penggubal dasar dan pemimpin politik dapat memahami masalah petani dan mengambil langkah-langkah bagi kebaikan semua pihak.

Tambahnya, dasar kebebasan mengkritik, menyelidik dan teguran yang diamalkan oleh negara ini, setidak-tidaknya dapat diserapkan sebagai cadangan bersama bagi memimpin dan memajukan lagi pembangunan pertanian.

"Walaupun kadar kemiskinan telah kurang dari 49.3 peratus pada tahun 1970 ke 29.2 peratus, kadar ini masih merunsingkan negara," tegas Encik Anwar.

Ujarnya, cadangan dan kesimpulan kajian yang dilaksanakan oleh para sarjana perlu bagi membanteras kemiskinan sebagai satu jihad yang bererti.

Katanya, kadar kemiskinan desa sebanyak 37.7 peratus, 12.6 peratus di bandar pada tahun 1980, dan 46.6 peratus kadar kemiskinan penduduk Melayu, India - 27.3 peratus dan Cina - 17.4 peratus juga harus diseimbangkan supaya keadilan dapat dinikmati oleh semua pihak.

"Cita-cita dan tujuan Dasar Ekonomi Baru (DEB) mesti diteruskan untuk menentukan penyertaan ekonomi di kalangan masyarakat orang-orang Melayu di desa," tegasnya.

Tambahnya, memperjuangkan keadilan untuk Bumiputera bukan bermakna membantu kaum Bumiputera untuk mendapat kekayaan dan meninggalkan kaum-kaum yang lain.

Bahan asal dari Arkib  
Negara Malaysia